

02 APR 2001

Guru-Api

CARA UNIK UNTUK WUJUDKAN KEAMANAN SEJAGAT

Oleh: S.Retna

KUALA LUMPUR, 2 April (Bernama) -- Ketika sains dan teknologi menguasai kehidupan dan pemimpin dunia berusaha untuk mewujudkan keamanan sejagat, seorang lelaki mencabar sains dan berusaha untuk mewujudkan perpaduan global dengan cara tersendiri yang unik -- berguling-guling di atas api dengan tubuh badannya langsung tidak disentuh oleh api dengan matlamat semata-mata untuk keamanan.

Sri Rambhaviruswamigal, yang berasal dari Tanjavur, India telah melakukan aksi ini selama lebih 18 tahun melalui satu upacara yang dikenali sebagai "Uchista Mahaganapathy Yagna" dalam usaha mencari kemanaan sejagat dan kemakmuran.

Beliau menawarkan dirinya kepada "Agni" (dewa api menurut kepercayaan agama Hindu) sebagai persembahan terakhir untuk manusia membersihkan diri dan peringkat akhir ini dikenali sebagai "Uchishta Maha Ganapathi Homan." Uchishta bermakna yang tertinggi di kalangan yang terbaik.

Rambhaviruswamigal adalah pengikut mendiang Sri Ramanandedra Saraswathi Swamigal dan beliau menjadi pengikut gurunya selama 32 tahun sebelum mencapai Manthra Siddhi, yang membolehkannya melakukan aksi luar biasa.

"Saya telah banyak kali melakukan aksi ini dan saya pernah melakukannya selama 27 hari dan cuma berhenti untuk berehat," kata Rambhaviruswamigal, 61, dalam temubual dengan Bernama baru-baru ini.

Beliau menjalani kehidupan yang sangat sederhana dan beliau cuma makan dua biji pisang dan dua gelas susu sehari sebelum tidur untuk merehatkan dirinya. Sudah 18 tahun beliau tidak meminum air atau mengambil makanan lain.

"Apabila saya bersembahyang dengan perut kosong, saya mencapai gegaran dalaman (badan) tanpa merasai sesuatu di luaran...sembahyang amat penting," kata beliau.

Beliau berasal dari keluarga yang kuat berpegang kepada agama dan datuk neneknya 400 tahun lalu pernah menjadi guru Chakrapati Sivaji, dahulu Raja Maharastra, India.

Bapanya bekerja sebagai penyusun teks Vedic di sebuah perpustakaan yang didirikan oleh Sarabhoji Maharaj, yang berasal dari keturunan raja dan pemerintah.

Semasa zaman remaja, Rambhaviruswamigal menumpukan masanya membantu bapanya di perpustakaan dan ini membolehkannya memahami kewujudan manusia di bumi.

Walaupun sudah berkahwin dengan mempunyai tiga orang anak, beliau lebih menumpukan masanya untuk berbakti kepada kedua ibu bapa dan gurunya. Beliau pernah tidur di atas lantai di bawah katil gurunya.

Semasa berada di sini, beliau telah melakukan satu daripada upacara yang luar biasa itu di Vivekananda Ashram di Brickfields selama sembilan hari selain berguling-guling di atas api untuk tempoh yang lama.

Menurut beliau, keupayaannya melakukan aksi itu datangnya dari kesucian api, Agni, satu daripada lima unsur utama (yang lain ialah udara, eter, bumi dan udara).

Ketika ditanya mengenai upacara sembahyang yang dilakukannya, Rambhaviruswamigal berkata sembahyangnya tidak tertumpu kepada agama tertentu dan bahawa saya melakukannya untuk semua agama."

Pernah pada suatu ketika beliau menjadi pawang hujan, kali pertama di Damal, perkampungan terpencil yang terletak di sepanjang lebuh raya Chennai (dahulu Madras)-Bangalore.

Perkampungan ini tidak dibasahi hujan selama 25 tahun tetapi apabila swami melawat dan melakukan upacara Homam lima tahun lalu dan apabila upacara itu selesai, hujan turun dengan lebat tanpa berhenti selama hampir dua hari.

Pada tahun 1996, beliau melakukan upacara yang sama di Tamilnadu dan Karnataka.

Katanya, beliau melakukan pengorbanan untuk kebaikan negara-negara di dunia dan bukan untuk faedah individu.

-- BERNAMA

SR ES FAZ